

30 pèra skis en tschaler

Ils campiadis mundials en Japan ein la proxima finamira dil currider da cuorsa liunga Toni Livers da Trun

DA GIUSEP VENZIN

■ **L'emprena cuorsa dil cup mundial a Gaellivare en Svezia ha Toni Livers da Trun terminau sco 44avel. Malgrad quei rang mediocher eis el buca staus trumpaus: «All'entschatta dalla sesiun vala il temps ton sco il rang. Jeu haiel piars pauc ed astgel mirar cun optimissem egl avegnir.»** A Gaellivare ei il currider da cuorsa liunga sursilvan che habitescha a Tavau era separticipaus alla staffetta e terminau quella el 13avel rang. En quella staffetta ha Toni Livers mussau ina prestaziun extraordinaria. El ei staus il tierz spert dils currider dalla tecnica classica ch'ei curri ella tiarza e quarta midada. Il currider da 23 onns ha spiars strusch siat secundas sil currider «extra-terrester» Ole Einar Björndalen. «Jeu sun currius davos Lars Berger ed haiel profittau dad el», relativescha Toni Livers sia prestaziun. Tuttina sto il guardiacunfins conceder che la prestaziun extraordinaria ha dau curascha ad el per las proximas cuorsas. Quellas cuorsas han liug a Val d'Aosta ell'Italia ed a La Clusaz en Frantscha. «Jeu sperel ch'ei detti gleiti neiv», di Toni Livers duront ch'el prepara ils skis. A Tavau ha el anflau ina planira curclada cun neiv artificiala e leu seprepara el per las aventuras da quest'unviern.

Schef en cuschina ed en tschaler

«Jeu cuschinel cura che Seraina dat scola e preparel era ses skis. Persuenter fa ella per mei la lischiva.» Toni Livers habitescha a Tavau ensemen cun sia amitga Seraina Boner. Ella ei commembra dil cader B da Swiss Ski e medemamein engaschada el cup mundial. Tgi che cuschina

il meglier han ils dus sportists buca vulliu tradir. «Il meglier ei cu nus cuschinein ensemen.» La curridra da Claustra ha terminau il studi dalla scienza da sport all'universitad da Basilea cul «bachelor» ed instruescha a Tavau sport en piazza parziala. En tschaler ein ils skis postai en duas retschas. Ina retscha cotschna ed ina retscha melna. Dapi che Toni Livers fa cuorsa liunga – dapi 16 onns – cuora el cun ils skis dalla marca Fischer. Silla sesiun actuala ha el midau marca e cuora culs skis cotschens dalla marca Madshus. «Ei dat buca donn da far ina midada», commentescha Toni Livers la midada. La retscha melna ei la retscha skis da Fischer da sia amitga Seraina. En omisdus retschas ein denter 15 e 20 pèra skis postai. «Ei drova schon tons skis», di Toni Livers. Differentia neiv, differenta temperatura e differenta tecnica. «Diesch secundas san esser da gronda impurtonza», aschunta il meglier currider svizzer. L'emprena cuorsa dil cup mundial en Svezia cumprova quei. Fuss Toni Livers currius ils 15 kilometers diesch secundas pli spert, havess el terminau la cuorsa diesch rangs pli anavon.

Carriera programmada

Cura che Toni Livers ei entraus avon 16 onns el Team Panda dil Club da skis Trun eran bunamein mo buobas ella gruppa da cuorsa liunga e quei fuss bunamein stau in impediment pil buob schenau da far cuorsa liunga. Beinspert ein ils menaders stai perschuadi: Quei dat in sportist da vaglia. Toni Livers ha buca duvrau in motivatur. Mintga minuta libra era el sin loipa, denter Trun e Mustér ha el absolvii mellis kilometers.

La carriera da Toni Livers ei stada programmada gia ad uras. El ha survegniu en tgina ina dallas qualitats ch'ei drova per daventar sportist d'elita: La direzia. Als dis da Giuventetgna e sport da cuorsa liunga a Trun igl onn 1994 ei Toni Livers currius sco in dils favorits ella categoria OG 1. Ils skis da ses concurrents eran denton in bionton pli sperts ed el ha mumentau la medaglia. Il menader dil Team Panda ei seperstgisau enviars il bab da Toni pervia dalla unshida malgartejada: «Quei ei schon bien, il Toni sto era empernder da spiarer.»

Svilup continuont

Toni Livers ei semigliurau da onn tier onn ed ei pil pli staus en fuorma il dretg mument. Ella sesiun vargada ha el desistiu dallas cuorsas ella America dil nord per sepreparar meglier sill'olimpiada a Turin. Quei ei gartegiau ad el stupent ed el ei turnaus da Prigelato cun in diplom olimpic. Era per la sesiun actuala ha el tschentau prioritads: Ils campiadis mundials en Japan. Tenor basegns desista il currider era dalla «tour-de-ski» cun staziun en Tschechia, Tiaratudestga ed Italia. Quella tura ha liug dils 29 da december tochen ils 7 da schaner: «Sch'jeu sundel buca topfit, haiel jeu negin avantag.»

Il currider da Trun patratga denton vianon, savend ch'el ha aunc varga diesch onns temps da sesviluppar. Ina gronda part dils megliers currider da cuorsa liunga ein 30 e pli vegls, il victur dalla cuorsa en Svezia, il biatlet Ole Einar Björndalen, ei 33 onns vegls. Il guardiacunfins da Trun ei alla tscherca da ses cunfins, savend ch'el ha aunc ditg buca contonschiu quels.



Toni Livers e sia amitga Seraina Boner. Per omisdus ei il sport da cuorsa liunga dapli che pissiun.

FOTO G. VENZIN

SIAT

Regulativ dil Consorzi da scola

(mc) A l'ocasiun dalla davosa radunanza communal han vischinas e vischins da Siat approbau il regulativ dil consorzi da scola e scoletta che cumpeggia las vischnauncas da Siat, Rueun e Pigniu. El medem mument han ins era approbau il preventiv pigl onn 2007/2008 che quenta adossar a Siat in deficit da rodond 100 000 francs. Per saver realisar las lavurs da manteniment vid ils stabiliments dalla Alp da Rueun ha il suveran da Siat concediu in credit da 9000 francs. Sco successur da Bruno Cavigelli ch'ei mortis en uffeci vegn Maria Casanova-Cavigelli tscharnida ella cumissiuin da gestiun.



Pieder Vincenz en discuors culs representants dil vitg.

FOTO A. BEELI

Contact cul promotur

Pieder Vincenz ha referiu a Sagogn

■ (abc) **Ei seigi stau per el en plirs rigns ina premiera: Per l'ina ha el saviu discutir objectivamein, per l'otra eis ei stau l'emprena discussiun spirontamein per romontsch. Il promotur dall'economia ha visitau Sagogn.** En vesta al project dalla piazza da golf ei Sagogn confruntaus cun differentas damondas. Sch'il golf ei la soluziun ultima-ment enviars il regress economic ha Pieder Vincenz buca saviu gir. Sin invit dalla Pro Sagogn eis el s'entupaus dacuort culs interessents dall'economia e politica. Legreivlamein ein bunamein tuttas spartas stadas representadas, pia mistergners, survetschs, agricultura, construcziun, forestaless e schizun horticultura. Era la suprastanza communal ei separticipada alla serada.

Cun in referat cuort ha Pieder Vincenz presentau siu post ed ils projects ch'el ha instradau. Duront la discussiun suandonta eis ei vegniu getg ch'il promo-

tur seigi veramein buca staus culs mauns en sac ed hagi spitgau sin miracles. Talas sappi el dil reminent era buca far, ha el puntuau. Siu pensum principal seigi da preparar ina buna basa e porscher cussegliaziun competent. Il post dueigi esser liug da referenza per tuttas damondas. Tier certas ha Pieder Vincenz stuiu metter el clar ch'el seigi buca politicher, mo-bein ch'el lavuri ell'operativa. Ch'igl ei gartegiau al post da muentar ei decisiv. Duront in'ura han ils presents discutau cul promotur. Evidentamein ha la discussiun era inclus la tematica «golf». Pieder Vincenz ei perschuadius che Sagogn ha ina gronda schanza cun quei project. In hotel da golf vess el, ei drovi leutier in investur potent. Che la vischnaunca s'engaschi pil golf cun cumprar sulom ei tenor Pieder Vincenz essenzial e s'auda tier la schanza. El ha dau d'entellir da buca negligir e sutvaletar las autras spartas dall'economia locala e regiunala.

RAPPORTAU DA NOS LECTURS

S. Clau a Dardin-Pugaus

Ier, ils 6 da december ei stau il di da Sontgclau, in di grischatsch, sils aults scrola la dunna holla ora intec il tapets, pli engiu ella bassa bogna la plievgia praus e pradas. Il di dad ier regorda nus a s. Clau. La sera spetgavan nus affons cun desiderer quei sogn venerabel che veva nudau en siu cudisch grond duront igl onn ora las bunas ovras ed ils buns survetschs che nus vevan prestau. Denton era bein enqual falliment vegneva alla glisch.

A Pugaus, in liug solitari sul vitget da Dardin, sesanfla amiez la cultra ina caplutta dedicata a s. Clau. Quei pign, bein renovau sanctuari obtegn el decuors d'in onn bia visitaders ed il zennet resuna tochen giu el vitg. Per la fiasta da s. Clau envida la pleiv tgi che ha plascher e pedit al survetsch divin si Pugaus.

Allas 09.30 beneventa sur Giuseppe Ven-

zin vischins da Danis, Dardin e Breil alla s. messa en honor da s. Clau.

Avon biars onns era Pugaus in uclaun da Dardin. Igl onn 1708 ei la caplutta ch'era dedicata alla sontga Trinitad vegnida disfatga. Il fundatur Benedetg Vincenz lai ereger ina nova caplutta. Duront la construcziun han ins anflau ella vischinonza ina statua da Sontgclau ed aschia han ins dedicau il niev sanctuari a quei sogn.

Igl uclaun Pugaus dat ei buca pli, sulet enqual ruina regorda aunc vid quel. All'entschatta dil survetsch divin vein cantau la suandonta canzun:

A ti han nos babuns, sogn Clau, quest sanctuari dedicau. Eis staus fideivels a Pugaus da biars vischins zun veneraus.

Annamaria Albrecht



La caplutta da s. Clau a Dardin-Pugaus.

FOTO J. CAB ERNARD

LA QUOTIDIANA

Editor: Hanspeter Lebrument

Directur: Andrea Masüger

Schefredacziun:

Martin Cabalzar, schefredactor (mc)
Gieri Antoni Caviezel, substitut/producent (gac)

Redacziun:

Augustin Beeli (abc), Andreas Cadonau (ac),
Erwin Caduff (ec), Giuseppe Venzin (gv),
Collavuraturas redacziunalas:

Susi Bearth (sb), Gabi Degonda (gd), anr.

Adressas:

redacziun centrala:
La Quotidiana, Via centrala 4, 7130 Glion,
tel. 081 920 07 10, fax 081 920 07 15.

E-mail: redaktion-lq@suedostschweiz.ch

Sutselva/Renania: La Pünt, 7433 Donat,
tel. 081 630 70 53, fax 081 630 70 51.

Editura Südostschweiz Presse AG.

Via dalla caserna 1, 7007 Cuir;
tel. 081 255 50 50, fax 081 255 51 00

Manader da l'editura: Beat Ravaioli

Servetsch d'abunents e da distribuziun:
tel. 0844 226 226, E-Mail abo@suedostschweiz.ch

Inserats

Südostschweiz Publicitas AG,
Via centrala 4, 7130 Glion

tel. 081 920 07 17, fax 081 920 07 18,
E-mail: ilanz@so-publicitas.ch

La Quotidiana cumpara tschintg gidas ad emna
Ediziun: «Die Südostschweiz»: 139 568 exemplars.